

«Կղերիկոսք եւ ժողովուրդքս հովուեցին ընդ ձեռամբ քո՝ ի կեանս քո»:

Ժողովուրդն. Ամէն:

«Պատուիրեա հարազատաց (քոց՝ զի) բարեմիտ լիցին եւ հեզք՝ ի վերայ ժողովրդեանս եւ աղքատաց. որպէս զի կեցեալ նոքօք՝ ի հաճոյսն Աստուծոյ՝ ժառանգիցէք զյաւտենական կեանսն»:

Ժողովուրդն. Ամէն:

«Զոր տայ մեզ այն՝ որում վայելէ փառք, իշխանութիւն եւ պատիւ, յաւիտեանս. Ամէն»:

Յետ այսր առնուն զնա թագովն պսակեալ՝ եպիսկոպոսքն եւ կղերիկոսքն՝ ի սրբոյ խորանէն, եւ տանին ՚ի բարձրագոյն աթոռ թագաւորութեան՝ որ եղեալ է ՚ի տաճար եկեղեցոյն. եւ ՚ի գալն երգեն. «Տացէ քեզ Տէր ըստ սրտի քում զամենայն խնդրուածս քո»։ Եւ յորժամ գան՝ ասէ եպիսկոպոսապետն.

«Ա՛ն զայթոռ հայրենի, զոր ժառանգես արդարութեամբ, եւ նստիս ՚ի սա կամօք Աստուծոյ եւ հօր քոյ, եւ հաստատիս օրհնութեամբ եպիսկոպոսացս ծառայից Աստուծոյ: Յորժամ նստիս ՚ի կղերիկոսս՝ պատուեցես զնոսա յամենայն տեղւոջ, զի մեօք խօսի Քրիստոս. որ պահեցէ զքեզ ՚ի փառս՝ այժմ, եւ բարձրացուցէ ՚ի յաւիտենական կեանսն, ՚ի փառս անուան իւրոյ, որ է օրհնեալ յաւիտեանս»:

Ապա նստուցանեն զնա եպիսկոպոսքն յաթոռն. եւ ասէ եպիսկոպոսապետն զաղօթս զայս.

«Տէր մեր Յիսուս Քրիստոս, որ է թագաւոր թագաւորաց եւ տէր տերանց, որ թագաւորէ ընդ Հօր եւ Սուրբ Հոգոյն, հաստատեցէ զքեզ յայսմ աթոռոյ՝ ի վերինն, եւ հանգուցէ յիւր արքայութիւն»:

Յետ այսր համբուրեն զթագաւորն եպիսկոպոսքն եւ ամենայն ժողով կղերիկոսացն. եւ ամենեքեան զուարճանան, եւ հարկանեն զգանգակսն ամենայն քաղաքին. եւ եղանակեն, *Դէ Տէրում լաւտամոյզ*⁸⁹: Եւ երգեն զերգս զոր ասացեալ ասեն մեծի Սուրբ Լուսաւորչին մերոյ Գրիգորի⁹⁰, ՚ի բարի եւ ՚ի սուրբ արքայն Տրդատ.

Ի վերին ՚ի յօգնականութենէ, ՚ի վերին ՚ի յօգնականութենէ՝ ծագեցաւ քեզ հանդէս բարեպաշտութեան. որ առատապարգեւ բնաւորաբար զբա-

⁸⁹ Այս է Te Deum laudamus, Զքեզ, Աստուած, գովարանեմք:

⁹⁰ Այլք համարին Մովսիսի Խորենացոյ երգեալ զայս նուագ: